

BERTSO BERRIAK

Xabier Paga

Boisetik jarriak

I

Mekara joan behar den legez
musulman bekataria,
inoiz azaltzen den gisan Halley
kometa hegalaria,
nola taldera itzuli ohi den
apartatu den ardia...
Bost urtean behin mundu osora
zabaltzen da deialdia,
euskaldun denok Ameriketara
dugun hitzordu handia,
gutxienez behin bizi behar den
Boiseko euskal jaialdia.

II

Bilbao-Paris ordu bi dira,
siesta on bat bestela,
Paris-Seattle egun erdi bat,
iragarkiak bezela,
Seattle-Boise bi ordu t'erdia,
erromerian Kupela,
pasaportea esku batean
bestean bidai-txartela,
bide luzea egin ondoren
Idahora goazela...
hona helduta ia ematen du
Munitibarren gaudela!

III

Dantza-taldeak, ikastola bat,
ikurriñak alboz albo,
Ameriketara batzen gaituen
herria bizirik dago,
inork epaitu ezin dezakeen
nortasunaren abaro.
Nola ote da posible egun,
(seko harriturik nago!?)
asaben lurra utziagatik
Atlantikotik harago
Boise sentitzen dudala hura
baino Euskal Herriago?

INIGO AZKONA



IV

Euskara erraz galtzen den arren,
(hori ez da nobedade)
Boisen oraindik hitzun ugari
dira hizkuntzaren jabe.
Bizkaitar, baxe-nafar, lapurtar...
Zenbat gizon eta andre
“erran gura dot” gisako moldez
mintzo direnak halere!
Batua propio bat sortu dute
Euskaltzaindiarik gabe,
elkar ulertu nahi den garaian
arauak soberan daude.


V

Boisek badauka altxor handi bat
zelosamente gordea,
mendebaldeko edozein urre
pipita baino hobea:
alkate jauna gizon ona da,
pertsonek paregabea,
euskaraz aise egiten duen
demokrata dotorea.
Hobe Euskadin alkate gisan
dugun maketo taldea
ausartu balitz segitzera Dave
Bietarren adibidea.

VI

Presente egon arren aizkorak
eta zilindro astunak,
iraganeko estanpa honen
zerbait du etorkizunak.
Amerikarrak dira jaialdi
honetan dauden lagunak
baina eurengan lekua dauka
izaera euskaldunak;
nola Amerikan geroa duen
euskaldunen nortasunak,
guretzat zerbait izango ahal du
Europako Batasunak?

DOINUA: “Albzturtikan Bidaniraino”.



Bidali zure sortak bertsoak@argia.com helbidera. Aukeratuak orri honetan argitaratuko ditugu.